



Rady rozkláduje sobuiniciator tak mjenowaneho Fabmobila Bosćij Pjaca (naprawo) zajimcam funkciju a skutownosć 3D-ćišćaka. Dwuposchodowy bus Fabmobil bě w minjenym šulskim léče tež tyždensce na dwór Budyskeho Serbskeho šulskeho a zetkawanskeho centruma přijěl. Z přetwarjenym busom chce Berlinske studijo za wuměstwo a design, za kotrež tež rodzeny Konječan Pjaca skutkuje, předewšěm šulerjam aktualnu techniku zblížić.

Foto: SN/Mačij Bulank

„Inwestujemy wjele mocy“

Fabmobil nominowany za Zwjazkowe myto za kulturne kublanje

Budyšin (am/SN). Wot lońšeho oktobra je čorný dwuposchodowy bus Fabmobil tyždensce na dwór Serbskeho šulskeho a zetkawanskeho centruma w Budyšinje přijěl. A sakske ministerstwo za wědomosć a wuměstwo je Fabmobil za Zwjazkowe myto za kulturne kublanje namjetowało. Z dohromady 104 zapodatyh projektow wupyta wone džesać, z kotrychž chce tři po 20 000 eurach mytować. „Inwestujemy wjele mocy do projekta. Jara bych so nad mytom zwjeselił, dokelž móhli z pjenjzami bus dalše léto financować“, rozkláduje sobuiniciator Fabmobila Bosćij Pjaca. „Popraš bych je tamny wězo tež, wšako su woprawdže dobre projekty nominowane.“ Tuchwilu dóstawa Fabmobil financnu podpěru Zwjazkoweje kulturneje załožby, kotraž pak w septembru wuběži. Nimo toho spěchujajón dalše institucije, kaž sakske ministerstwo za wědomosć a wuměstwo, Sakska kulturna załožba a załožba PwC. „Wjeselimy so nad kóždějkuli po-

mocu. Naše durje pak steja wšitkim wopytowarjam dale šěroko wotewrjene“, Pjaca wuzběhnje.

Tak mjenowany Fabmobil je mjez druhim prawidłownje we wosom šulach wokrjesa Budyšin po puću był – wot gymnazija hač k powołanskej šuli. Tak bě mjeztym minjene šulske léto stajnje pónđzelu tež w Budyskim Serbskim šulskim a zetkawanskim centrumje. Za ideju tči Berlinske studijo za wuměstwo a design „The Constitute“. „Zaběramy so z nowymi technologijemi. Chcemy ludžom aktualnu techniku, kaž 3D-ćišćak, zblížić. Mam za wulki problem, zo je druhdže dawno komercializowana technika wosebje na wsach hišće jara njeznata“, rodzeny Konječan rozprawja. „Chcemy zajimcam wšitkich generacijow z pomocu techniki něšto nowe skićić. We wulkich městach drje namakaš techniske labory, tak mjenowane FabLabs, na wsy pak tajkich alternatiwow njeje.“ Studijo zaběra so na přikład z nahrawanjom

z pomocu 360°-kamery, ze zhotowjenjom wšelakich 3D-ćišćow, samo z keramiky, a ze specielnymi konstrukcijemi kaž funkawu, z kotrež hodža so digitalne powěšće na scěnowinje zwobraznić.

W meji 2016 nasta ideja Fabmobila, kotruž su štyri měsacy pozdžišo zwoprawdžili. Zamołwići kupichu dwuposchodowy bus a přetwarichu jón, tak zo maja w nim nětko nimo 3D-ćišćakow tež rjemjeslniske džělowe městna a laser-cutter. „Poskićamy džěłarnički, kaž 2D- a 3D-ćišć, hacking a koděrowanje a dalše na polu elektrotechniki“, Bosćij Pjaca rozložuje. „Rezonanca je wo wjele pozitiwniša, hač sej myslachmy. Hólcy kaž tež holcy so za Fabmobil jara zajimujaj.“ Jeho wužiwarjo chwala sej wulkotnu atmosferu a techniske možnosće, kotrež jim bus skići. „Je prosće cool. Fabmobil tworí alternatiwu, tak zo njesydaš jenož doma před ličakom“, hódnoći moderny projekt Malte Melde, šuler Serbskeje wyšeje šule Budyšin.